

編號 1 號

【阿姆个手路菜】鄒瑞梅 原作

頭擺个人，生活盡簡單乜盡艱苦，細人仔想愛食東西，就會想著灶下，想著灶下，佢就會想著阿姆个手路菜。

阿姆當煞猛，逐日天㗎光就落灶下煮食，阿姆煮个番薯糜一等好食，桌頂有菜脯卵、地豆、還有阿姆自家滷个醃瓜仔，老嫩大細圍圍共下食飯當開熱，尤其係正、二月冷颼颼仔¹个天時，做得食著燒嬾嬾个番薯糜，實在當幸福。

記得有一日，佢在學校轉來个時節，遠遠就鼻著雞酒味，佢腳步嘎行愈遽，三步打做兩步，遽遽行落灶下。阿姆看著佢就笑咪咪仔摺佢講：「昨晡日隔壁个秀蘭阿姨降俵仔，做月愛食雞酒，身體正會好，阿姆刷一隻大閘雞煮雞酒摺佢補身體。」哈！看得著食毋著，害佢走到恁煞猛。阿姆笑佢講：「食飯打赤膊，做事尋衫著。」續等講：「有啦！桌頂有留一碗公雞酒，煞煞去手洗洗啊，趕燒食啦！」佢就知咧！阿姆一等惜佢，有好食个東西一定會留分佢食，還湛哦！

講著煮食，阿姆項項會、項項曉，逐年一到清明，阿姆就會

做紅板，艾板，五月節會包板粽、煨粽，中元打槩粿，過年炊甜板、發板、菜頭板。學校放學轉來，阿姆會煇²甜板分佢摺老妹、老弟食，大家坐在門墩下，你一口、佢一口，該種甜甜个味緒，到這下想著還會流口水。四炆四炒係阿姆个手路菜，就因為阿姆个好手藝，莊頭莊尾个叔公阿伯最好來屋下打鬥敘，阿公會泡茶請人客，阿姆會燻爌肉，煮好食个「客家小炒」、「豬腸炒薑絲」分大家緊食緊打嘴鼓，大人在廳下鬧摠摠³，歸陣細人仔就在大禾埕踢銅笕仔、跳索仔、無到半夜無煞棚。

阿姆个手路菜佢乜加減有學兜仔，逐擺放學个時節，佢會去灶下摺阿姆搵煮食，看著歸屋下人食到笑咪咪，佢乜試著當歡喜。

² 煇：音 po；油炸。

³ 鬧摠摠：音 nau + cai cai；形容非常熱鬧。

¹ 冷颼颼仔：音 lang` siu siu er；冷颼颼。